

Prezidénsia Konsellu Ministrus

IX Governu Konstitusionál

Komunikadu Imprensa

Sorumutuk Konsellu Ministrus nian iha loron 9 fulan-agostu tinan 2023

Konsellu Ministrus hala'o sorumutuk iha Palásiu Governu, Dili, no aprova projetu Rezolusaun Governu nian ne'ebé apresenta husi Primeiru-Ministru, Kay Rala Xanana Gusmão, ne'ebé aprova **donativu ho valór dolar amerikanu rihun 750 hodi oferese ba Repúblika Demokrátika São Tomé e Príncipe hodi organiza Konferénsia Xefe Estado no Governu Komunidade Países Lian Portugés (CPLP) XIV.**

....

Konsellu Ministrus aprova projetu Proposta Lei ne'ebé apresenta husi Ministra Finansas, Santina José Rodrigues F. Viegas Cardoso, ba **alterasaun dahuluk Lei n. 15/2022, loron 21 fulan-dezemburu, kona-ba Orsamentu Jerál Estado ba tinan 2023 no Lei n. 2/2022, loron 10 fulan-fevereiru, kona-ba enkuadramentu ba Orsamentu Jerál Estado no Jestaun Finanseira Públika, alterasaun daruak Lei n.8/2008, loron 30 fulan-juñu, Lei Tributária.**

Ho projetu Proposta Lei ida ne'e, despeza total husi Setór Públiku Administrativu tinan 2023 ho valór total konsolidadu dolar amerikanu 1.771.867.112. Administrasaun sentral iha despeza ida ne'ebé prevee ho valór dolar amerikanu 1.633.000.000. Seguransa Sosiál, sein Fundu Reserva Seguransa Sosiál, ho montante dolar amerikanu 130.965.306 (iha valór total konsolidadu la kontabiliza montante dolar amerikanu 75.860.306 husi Seguransa Sosiál ne'ebé mai husi transferénsia administrasaun sentral hodi evita ninia kontajen duplikada). Rejiaun Administrativa Espesial Oe-Cusse Ambeno (RAEOA) ninia valor estimado mak 83.762.112.

Hafoin eleisaun parlamentár loron 21 fulan-maiu tinan 2023 no simu pose Governu Konstitusionál IX nian, aprova ona orgánika foun Governu, nune'e presiza halo ajuste balun iha titulu klasifikasaun orgánika Orsamentu Jerál Estado nian.

Haree ba dadus ezekusaun orsamentál to'o ohin loron no Governu nia hanoin atu imprime kontensaun iha kontas públicas, ba efisiénsia iha uzu osan públiku no efikásia boot liu iha investimentu públiku, halo ona ezersísiu avaliasaun boot ida-ne'ebé rezulta identifikasaun ba poupanza iha servisu oin-oin no entidade Setór Públiku Administrativu no ne'ebé justifika redusaun despeza ida ne'ebé prevee ona iha Orsamentu Jerál Estado tinan 2023, nune'e mós montante transferénsia husi Fundu Mina-rai.

Hanesan propoin ona iha ninia programa, Governu Konstitusionál da-9 hakarak hamenus impaktu inflasaun no aumentu kustu vida ba sidadaun sira, hodi aumenta sira-nia poder kompra nian. Ba ida ne'e, halo ajustamentu ida ba taxa impostu seletivu konsumu no direitu aduaneiru nian ba importasaun ne'ebé bele aplika iha tinan 2023, ne'ebé aumenta iha inísiu tinan ne'e, liuhusi Lei n. 15/2022, loron 21 fulan-dezemburu, Orsamentu Jerál Estado ba tinan 2023 nian.

Tanba ne'e, halakon taxa impostu seletivu konsumu kona-ba masin-midar, nune'e mós aumentu ba direitu aduaneiru importasaun nian, no aplika filafali taxa anteriór ho 2,5%.

Governu mós aproveita hodi halo alterasaun ba diploma boot rua ne'ebé iha ligasaun besik ho Orsamentu Jerál Estado, iha Lei n. 2/2022, loron 10 fulan-fevereiru, Enkuadramentu ba Orsamentu Jerál Estado no jestaun finanseira pública, no iha Lei n. 8/2008, loron 30 fulan-juñu, Lei Tributária, ne'ebé altera husi Lei n. 5/2019, loron 27 fulan-agostu, ho objetivu atu asegura rigór no transparénsia ida ne'ebé boot iha ezekusaun Orsamentu Jerál Estado no kontas públicas nian. Alterasaun ida-ne'e inklui mudansa iha alterasaun orsamentál, hodi garante estabilidade boot ba Orsamentu Jerál Estado ne'ebé aprova ona, eliminaun ba lei Planu Opsaun Prinsipál, ne'ebé kria hodi troka nia fatin maka Planu Anuál Investimentu Estratéjiku, dokumentu tékniku ida ne'ebé apresenta planeamentu anuál ho impaktu ba orsamentu ne'ebé apresenta hamutuk ho proposta lei Orsamentu Jerál Estado, no ajuste ba rejime ezekusaun orsamentál iha período entre nomeasaun Governu no apresiasaun programa Governu nian, nune'e mós iha período entre rejisaun programa Governu no nomeasaun Governu foun. **REMATA**